

BOSNA I HERCEGOVINA
FEDERACIJA BOSNE I HERCEGOVINE
AGENCIJA ZA KVALITET I AKREDITACIJU U ZDRAVSTVU
U FEDERACIJI BOSNE I HERCEGOVINE
- UPRAVNI ODBOR -

BOSANSKI JEZIK

ODLUKA
O IZMJENAMA I DOPUNAMA STATUTA AGENCIJE ZA
KVALITET I AKREDITACIJU U ZDRAVSTVU
U FEDERACIJI BOSNE I HERCEGOVINE

Sarajevo, juna 2015. godine

Na osnovu člana 27. stav 1. alineja 1., a u vezi sa članom 32. stav 2. Zakona o sistemu poboljšanja kvaliteta, sigurnosti i o akreditaciji u zdravstvu ("Službene novine Federacije BiH", br. 59/05 i 52/11), Upravni odbor Agencije za kvalitet i akreditaciju u zdravstvu u Federaciji Bosne i Hercegovine, na XV sjednici održanoj 24.06.2015.godine, d o n o s i

O D L U K U

O IZMJENAMA I DOPUNAMA STATUTA AGENCIJE ZA KVALITET I AKREDITACIJU U ZDRAVSTVU U FEDERACIJI BOSNE I HERCEGOVINE

I.

U Statutu Agencije za kvalitet i akreditaciju u zdravstvu u Federaciji Bosne i Hercegovine („Službene novine Federacije BiH”, broj 94/07), u članu 7. u stavu 2, iza alineje 2, dodaje se nova alineja 3, koja glasi:

„- definiše sistem sigurnosnih standarda, kontinuirano prati i procjenjuje sigurnosne standarde, te izdaje certifikat zdravstvenim ustanovama u dijelu zadovoljenja standarda sigurnosti”.

Dosadašnje alineje od 3. do 9. postaju alineje od 4. do 10.

U dosadašnjoj alineji 3, iza riječi: „kvaliteta” briše se zarez i dodaje veznik „i”, kao i riječ „zadovoljenja standarda sigurnosti.”.

Dosadašnja alineja 4, mijenja se i glasi:

„obavlja postupak akreditacije zdravstvenih ustanova i certifikacije zdravstvenih ustanova u dijelu zadovoljenja standarda sigurnosti u skladu sa Zakonom, kao i propisima donijetim na osnovu Zakona, te s tim u vezi dodjeljuje, ukida, odnosno obnavlja akreditaciju i certifikaciju zdravstvenim ustanovama u dijelu zadovoljenja standarda sigurnosti.”.

II.

U članu 9. alineja 1. briše se.

Dosadašnje al. 2. - 5. postaju al. 1. – 4.

III.

Čl. 10., 11., 12. i 13. brišu se.

IV.

Član 14. mijenja se i glasi:

„Član 14.

Upravni odbor upravlja AKAZ-om.

Upravni odbor broji pet članova.

Predsjednika i članove Upravnog odbora imenuje i razrješava federalni ministar zdravstva saglasno proceduri utvrđenoj propisom o ministarskim, vladinim i drugim imenovanjima Federacije Bosne i Hercegovine, Zakonom, kao i propisom ministra zdravstva o bližim kriterijima za izbor predsjednika i članova upravnog odbora.

Predsjednik i članovi Upravnog odbora imenuju se na period od četiri godine i mogu biti ponovno imenovani za još jedan mandatni period.”.

V.

U članu 15. al. 7. i 8. mijenjaju se i glase:

„- propisuje mjerila za imenovanje ovlaštenih ocjenjivača vanjske provjere kvaliteta i standarda sigurnosti, te utvrđuje Popis ovlaštenih ocjenjivača vanjske provjere kvaliteta i standarda sigurnosti,

„- donosi odluku o izdavanju, ukidanju odnosno obnavljanju akreditacije i certifikacije zdravstvenoj ustanovi u dijelu zadovoljenja standarda sigurnosti.”

VI.

U članu 18. riječ: „četiri” zamjenjuje se riječju „tri”.

VII.

Član 22. mijenja se i glasi:

„Član 22.

Predsjednik i članovi Upravnog odbora, kao i članovi odbora i komisija Upravnog odbora, imaju pravo na naknadu za svoj rad, te pravo na naknadu putnih troškova ukoliko imaju prebivalište izvan sjedišta AKAZ-a, nastalih radi prisustvovanja sjednicama Upravnog odbora, kao i sjednicama odbora i komisija Upravnog odbora.

Visina naknade za predsjednika i članove Upravnog odbora utvrđuje se saglasno Odluci o visini naknade za rad predsjednika i članova upravnih i nadzornih odbora zdravstvenih ustanova u svojini Federacije Bosne i Hercegovine odnosno jednog ili više kantona i Federacije Bosne i Hercegovine zajedno („Službene novine Federacije BiH”, broj 59/11).

Visinu naknade za članove odbora i komisija utvrđuje Upravni odbor, na prijedlog direktora.

Naknada za putne troškove i dnevnice utvrđuje se na osnovu općih akata o putnim i drugim troškovima koji važe za uposlenike AKAZ-a.”

VIII.

Podnaslov „4. Ovlašteni ocjenjivači vanjske provjere kvaliteta” mijenja se i glasi: „4. Ovlašteni ocjenjivači vanjske provjere kvaliteta i standarda sigurnosti”.

IX.

U članu 23. st. 1., 2. i 3., iza riječi: „kvaliteta” dodaje se veznik „i”, kao i riječ: „standarda sigurnosti”.

X.

Član 24. mijenja se i glasi:

„Član 24.

Direktora AKAZ-a imenuje i razrješava Upravni odbor, uz prethodnu saglasnost ministra zdravstva, na period od četiri godine, sa mogućnošću ponovnog izbora za još jedan mandatni period, a saglasno proceduri utvrđenoj propisom o ministarskim, vladinim i drugim imenovanjima Federacije Bosne i Hercegovine.

Za direktora AKAZ-a se može imenovati osoba koja, pored općih uvjeta utvrđenih propisima o radu, ima VII stepen školske spreme – doktor medicine, odnosno visoko obrazovanje prvog ciklusa (koji se vrednuje do 360 ECTS bodova u skladu sa članom 5. stav 3. Okvirnog zakona o visokom obrazovanju u Bosni i Hercegovini („Službeni glasnik BiH”, br. 59/07 i 59/09), Bolonjskog sistema studiranja, medicinski fakultet, diplomirani pravnik ili diplomirani ekonomista, odnosno visoko obrazovanje prvog ciklusa (koji se vrednuje sa 240 ECTS bodova) ili

drugog ili trećeg ciklusa Bolonjskog sistema studiranja, pravni ili ekonomski fakultet, sa najmanje tri godine radnog iskustva na poslovima u oblasti poboljšanja kvaliteta, sigurnosti i akreditaciji u zdravstvu odnosno na poslovima zdravstva.

Ako za direktora bude izabrana osoba sa završenim pravnim ili ekonomskim fakultetom, pomoćnik direktora AKAZ-a mora biti doktor medicine.

Direktor za svoj rad i poslovanje AKAZ-a odgovara Upravnom odboru i ministru zdravstva.”.

XI.

U članu 25. stav 2. u al. 8, 9. i 13. briše se veznik „i”, kao i riječi: „Savjetodavno vijeće”.

U alineji 12. iza riječi: „akreditacija”, dodaje se veznik „i” i riječ: „certifikacija u dijelu zadovoljenja sigurnosnih standarda”.

XII.

U članu 30. stav 1. brišu se riječi: „Savjetodavnog vijeća”, a riječ: „te” se zamjenjuje veznikom „i”.

XIII.

Član 31. mijenja se i glasi:

„Član 31.

U slučajevima razrješenja Upravnog odbora utvrđenih u članu 30. ovog statuta, odnosno u slučaju isteka mandata Upravnog odbora kada novi Upravni odbor još nije imenovan, ministar zdravstva može imenovati privremeni Upravni odbor na period najviše tri mjeseca koja se ne mogu ponoviti, a u skladu sa propisom o ministarskim, vladinim i drugim imenovanjima Federacije Bosne i Hercegovine.

U slučaju razrješenja direktora iz razloga utvrđenih u članu 30. ovog statuta, odnosno u slučaju isteka mandata direktora kada novi direktor još nije imenovan, Upravni odbor, uz saglasnost ministra zdravstva, može imenovati vršitelja dužnosti direktora, i to period na najviše tri mjeseca koja se ne mogu ponoviti, a u skladu sa propisom o ministarskim, vladinim i drugim imenovanjima Federacije Bosne i Hercegovine.”.

XIV.

U članu 32. stav 1. u alineji 2, iza riječi: „Upravnog odbora” briše se veznik „i” i riječi: „Savjetodavnog vijeća AKAZ-a” i na kraju teksta se stavlja tačka.

XV.

U članu 37. stav 1. mijenja se i glasi:

„AKAZ donosi finansijski plan do 30. septembra tekuće godine za narednu godinu.”.

XVI.

U članu 39. stav 2. riječ: „tromjesečni” zamjenjuje se riječju „kvartalni”.

XVII.

U članu 48. stav 2. u alineji 5, iza riječi: „Upravnog odbora” stavlja se tačka i brišu riječi: „i Savjetodavnog vijeća i dr.”.

XVIII.

U članu 52. stav 1. riječi: „propisanim Zakonom o slobodi pristupa informacijama u Federaciji Bosne i Hercegovine „Službene novine Federacije BiH”,

broj 32/01", zamjenjuju se riječima: „utvrđenim propisima o slobodi pristupa informacijama u Federaciji Bosne i Hercegovine”.

IXX.

Naziv poglavlja „XIII – PROFESIONALNA TAJNA” mijenja se i glasi: „XIII – POSLOVNA I PROFESIONALNA TAJNA”.

XX.

Član 53. mijenja se i glasi:

„Član 53.

Poslovnom tajnom smatraju se isprave i podaci čije bi saopštavanje ili davanje na uvid neovlaštenoj osobi bilo suprotno poslovanju AKAZ-a ili štetilo njegovom ugledu odnosno interesu ili ugledu zaposlenih, te štetilo generalno politici poslovanja i poslovnim potezima AKAZ-a.

AKAZ je dužan osigurati zaštitu i sigurnost ličnih podataka i u informacionom sistemu, a saglasno propisima o zaštiti ličnih podataka.

Poslovnu tajnu dužni su čuvati uposlenici AKAZ-a koji na bilo koji način saznaju za istragu ili podatak koji se smatra poslovnom tajnom, i to i po prestanku rada u AKAZ-u.

Poslovnu tajnu iz stava 1. ovog člana dužni su čuvati predsjednik i članovi Upravnog odbora, te članovi odbora i komisija i to i nakon prestanka obavljanja funkcije u navedenom odboru ili komisiji.

Poslovnom tajnom posebno se smatraju: dokumenti koje direktor proglasi poslovnom tajnom, podaci koje nadležna tijela kao povjerljive saopšte AKAZ-u, mjere i načini postupanja u slučaju nastanka vanrednih okolnosti.

Povreda dužnosti čuvanja poslovne tajne predstavlja težu povredu radne obaveze.

O čuvanju poslovne tajne brine direktor AKAZ-a.”.

XXI.

Član 54. mijenja se i glasi:

„Član 54.

Profesionalnom tajnom smatra se sve ono što ovlašteni ocjenjivači vanjske provjere kvaliteta i standarda sigurnosti saznaju o zdravstvenom stanju pacijenata, odnosno korisnika usluga u postupku vanjske provjere kvaliteta i sigurnosti, a čije bi saopštavanje neovlaštenoj osobi moglo nanijeti štetu korisniku usluge ili trećoj osobi.

Povreda dužnosti čuvanja profesionalne tajne predstavlja težu povredu radne obaveze i pravila kodeksa medicinske etike.

O čuvanju profesionalne tajne brine direktor AKAZ-a”.

XXII.

U članu 57. stav 1. alineja 5. briše se.

Dosadašnje al. 6. i 7. postaju al. 5. i 6.

U dosadašnjoj alineji 7. broj „4” zamjenjuje se brojem „3”.

XXIII.

U članu 58. stav 2. riječi: „Savjetodavnom vijeću i” brišu se.

XXIV.

U članu 60. stav 2. briše se.

Dosadašnji stav 3. postaje stav 2.

XXV.

U članu 61. stav 2. mijenja se i glasi:
„Pravilnike iz stava 1. ovog člana donosi Upravni odbor na prijedlog direktora.”.

XXVI.

U članu 65. iza riječi: „Upravni odbor” briše se zarez i riječi: „Savjetodavno vijeće”.

XXVII.

Postojeći opći akti AKAZ-a uskladit će se sa odredbama ovog statuta u roku od tri mjeseca od dana stupanja na snagu ovog statuta.

XXVIII.

Odluka o izmjenama i dopunama Statuta Agencije za kvalitet i akreditaciju u zdravstvu u Federaciji Bosne i Hercegovine, nakon što Parlament Federacije Bosne i Hercegovine da saglasnost, stupa na snagu osmog dana od dana objavljivanja u „Službenim novinama Federacije Bosne i Hercegovine”.

Broj: UO-02-02-1074-2/15
Sarajevo, 24.06.2015.godine



**Predsjednik
Upravnog odbora**
Alma Vranić
Mr. sc. Alma Vranić

O b r a z l o ž e n j e

Odluke o izmjenama i dopunama Statuta Agencije za kvalitet i akreditaciju u zdravstvu u Federaciji Bosne i Hercegovine

I – ZAKONSKI OSNOV

Zakonski osnov za donošenje ove odluke, odnosno Statuta predviđen je u članu 27. stav 1. alineja 1., a u vezi sa članom 32. stav 2. Zakona o sistemu poboljšanja kvaliteta, sigurnosti i o akreditaciji u zdravstvu ("Službene novine Federacije BiH", br. 59/05 i 52/11), kojim je regulirano da Statut Agencije za kvalitet i akreditaciju u zdravstvu u Federaciji Bosne i Hercegovine (u daljem tekstu: Statut AKAZ-a) donosi Upravni odbor Agencije za kvalitet i akreditaciju u zdravstvu u Federaciji Bosne i Hercegovine (u daljem tekstu: Upravni odbor).

II – RAZLOZI ZA DONOŠENJE

Članom 10. stav 3. Zakona o izmjenama i dopunama Zakona o sistemu poboljšanja kvaliteta, sigurnosti i o akreditaciji u zdravstvu ("Službene novine Federacije BiH", broj 52/11) regulirana je obaveza usklađivanja važećeg Statuta Agencije za kvalitet i akreditaciju u zdravstvu u Federaciji Bosne i Hercegovine koji je objavljen u "Službenim novinama Federacije BiH", broj 94/07 sa odredbama citiranog Zakona.

Takođe, sa donošenjem novih zakona iz oblasti zdravstva, i to: Zakona o zdravstvenoj zaštiti ("Službene novine Federacije BiH", br. 46/10 i 75/13), Zakona o apotekarskoj djelatnosti ("Službene novine Federacije BiH", broj 40/10), Zakona o pravima, obavezama i odgovornostima pacijenata ("Službene novine Federacije BiH", broj 40/10), Zakona o stomatološkoj djelatnosti ("Službene novine Federacije BiH", broj 36/12), Zakona o sestrinstvu i primaljstvu ("Službene novine Federacije BiH", broj 43/13), Zakona o transplantaciji organa i tkiva u svrhu liječenja ("Službene novine Federacije BiH", broj 75/09) predviđena je dopuna djelatnost Agencije za kvalitet i akreditaciju u zdravstvu u Federaciji Bosne i Hercegovine (u daljem tekstu: AKAZ), a to je obaveza da ista izradi i prati provedbu sigurnosnih standarda u oblasti zdravstva, te da, s tim u vezi, a nakon provedenog postupka, izda certifikat zdravstvenim ustanovama u dijelu zadovoljenja sigurnosnih standarda.

Slijedom navedenih zakonskih obaveza pristupljeno je izradi ovog statuta.

III – OBRAZLOŽENJE PRAVNIH RJEŠENJA

U tački I. vrši se izmjena u članu 7. stav 1. al. 2, 3 i 4. važećeg Statuta AKAZ-a. Naime, u ovim alinejama vrši se dopuna djelatnosti AKAZ-a, a to je definisanje sistema sigurnosnih standarda, kontinuiranog praćenja i procjene sigurnosnih standarda, te izdavanje certifikata zdravstvenim ustanovama u dijelu zadovoljenja standarda sigurnosti. Takođe, dopuna djelatnosti je da AKAZ obavlja, pored postupka akreditacije i postupak certifikacije zdravstvenih ustanova u dijelu zadovoljenja standarda sigurnosti, što uključuje dodjelu, ukidanje, odnosno obnavljanje akreditacije i certifikacije zdravstvenim ustanovama u dijelu zadovoljenja standarda sigurnosti.

U tački II. vrši se izmjena člana 9., tako da se briše alineja 1. koja se odnosi na Savjetodavno vijeće, obzirom da je isto brisano odredbama Zakona o izmjenama i dopunama Zakona o sistemu poboljšanja kvaliteta, sigurnosti i o akreditaciji u zdravstvu.

Tačkom III. brišu se odredbe čl. 10, 11, 12. i 13. važećeg Statuta, a koje su se odnosile na uspostavu i rad Savjetodavnog vijeća, obzirom da je isto brisano

odredbama Zakona o izmjenama i dopunama Zakona o sistemu poboljšanja kvaliteta, sigurnosti i o akreditaciji u zdravstvu.

Tačkom IV. mijenja se član 14. važećeg Statuta koji se odnosi na Upravni odbor, broj članova Upravnog odbora, način njegovog imenovanja, kao i period imenovanja, a saglasno članu 4. Zakona o izmjenama i dopunama Zakona o sistemu poboljšanja kvaliteta, sigurnosti i o akreditaciji u zdravstvu.

Tačkom V. vrši se izmjena u članu 15. u stavu 1. u al. 7. i 8. tako da se u djelatnosti Upravnog odbora reguliraju funkcije koje se odnose na sigurnosne standarde.

Tačkom VI. vrši se izmjena u članu 18. važećeg Statuta, a kojim je bilo predviđeno da se inicijativa za održavanje sjednice Upravnog odbora koju mogu podnijeti i najmanje četiri člana Upravnog odbora. Imajući u vidu da sada Upravni odbor broji pet članova smatramo da bi ovu inicijativu mogla podnijeti tri člana Upravnog odbora.

Tačkom VII. mijenja se član 22. važećeg Statuta, a kojim se utvrđuje pravo na naknadu za rad, te pravo na naknadu putnih troškova predsjednika i članova Upravnog odbora, kao i članova odbora i komisija Upravnog odbora. Visina naknade za predsjednika i članove Upravnog odbora utvrđuje se saglasno Odluci o visini naknade za rad predsjednika i članova upravnih i nadzornih odbora zdravstvenih ustanova u svojoj Federacije Bosne i Hercegovine odnosno jednog ili više kantona i Federacije Bosne i Hercegovine zajedno („Službene novine Federacije BiH”, broj 59/11).

Tač. VIII. i IX. mijenja se podnaslov 4., kao i član 23. u st. 1, 2. i 3., tako da se iza riječi „kvaliteta” dodaje veznik „i”, kao i riječ: „standarda sigurnosti”.

Tačkom X. mijenja se član 24. važećeg Statuta, a u skladu sa članom 5. Zakona o izmjenama i dopunama Zakona o sistemu poboljšanja kvaliteta, sigurnosti i o akreditaciji u zdravstvu.

Tač. XI. i XII. mijenja se član 25. važećeg Statuta, i to u al. 8, 9, i 13., a u kojima se briše riječ: „Savjetodavno vijeće”, te se u alineji 12, iza riječi: „akreditacija” dodaje veznik i, kao i riječi: „cetrifikacija u dijelu zadovoljenja sigurnosnih standarda”. Takođe u članu 30. u stavu 1. važećeg statuta brišu se riječi: „Savjetodavnog vijeća”.

Tačkom XIII. mijenja se član 31. važećeg Statuta, a kojim se predviđaju slučajevi privremenog imenovanja Upravnog odbora i direktora na period na najviše tri mjeseca koja se ne mogu ponoviti, a kako je to sada predviđeno članom 3. Zakona o izmjenama i dopunama Zakona o ministarskim, vladinim i drugim imenovanjima Federacije Bosne i Hercegovine („Službene novine Federacije BiH”, broj 65/13).

Tačkom XIV. mijenja se član 32. važećeg Statuta u kojem se brišu riječi: „Savjetodavno vijeće”.

Tačkom XV. mijenja se član 37. stav 1. važećeg Statuta. Naime, donošenje finansijskog plana mora biti okončano saglasno rokovima utvrđenim Zakonom o budžetima u Federaciji Bosne i Hercegovine („Službene novine Federacije BiH”, br.102/13, 9/14, 13/14 i 8/15). Iako AKAZ nije vanbudžetski fond, isti ostvaruje pravo na transfer iz Budžeta Federacije BiH, te je s tim u vezi potrebno poštovati rokove za izradu finansijskih planova utvrđenih Zakonom o budžetima u Federaciji Bosne i Hercegovine.

Tačkom XVI. mijenja se član 39. važećeg Statuta, tako da se riječ „tromjesečni” zamjenjuje riječju „kvartalni”.

Tačkom XVII. mijenja se član 48. stav 2. alineja 5. važećeg Statuta tako da se brišu riječi: „Savjetodavno vijeće”.

Tačkom XVIII. mijenja se član 52. stav 2. važećeg Statuta, tako da se riječi: „propisanim Zakonom o slobodi pristupa informacijama u Federaciji Bosne i Hercegovine „Službene novine Federacije BiH”, broj 32/01”, zamjenjuju se riječima:

„utvrđenim propisima o slobodi pristupa informacijama u Federaciji Bosne i Hercegovine”.

Tač. XIX., XX. i XXI. mijenja se naziv dosadašnjeg poglavlja „XIII- PROFESIONALNA TAJNA” važećeg Statuta u naziv „XIII- POSLOVNA I PROFESIONALNA TAJNA”. Također, bolje se uređuju pravna rješenja u postojećem čl. 53. i 54. Statuta. Naime, ocijenjeno je da je potrebno praviti distinkciju između poslovne i profesionalne tajne. Poslovnu tajnu predstavljaju podaci koji su kao poslovna tajna određeni zakonom, drugim priopisom ili općim aktom, te su rezultata obavljanja djelatnosti određenog subjekta. Za razliku od poslovne tajne, profesionalna tajna sadrži podatke o osobama koje saznaju osobe tokom obavljanja svog zvanja i djelatnosti, npr. vanjski ocjenjivači kvaliteta i sigurnosnih standarda. Takođe je proširen krug osoba na koje se odnosi obaveza čuvanja poslovne i profesionalne tajne, kao i period čuvanja poslovne odnosno profesionalne tajne. Direktor AKAZ-a ovlašteno je lice koje brine o čuvanju poslovne i profesionalne tajne.

Tačkom XXII. mijenja se član 57. stav 1. alineja 5. važećeg Statuta. Naime, ocijenjeno je da s obzirom da sada Upravni odbor ima 5 članova, izmjene i dopune Statuta mogu predložiti i najmanje tri člana Upravnog odbora, a ne četiri člana kako je to do sada bilo predviđeno u alineji 5.

Tačkom XXIII. mijenja se član 58. stav 2. važećeg Statuta, tako da se brišu riječi: „Savjetodavno vijeće”.

Tačkom XXIV. mijenja se član 60. važećeg Statuta kojim se briše stav 2. Naime, nepotrebno je da se, nakon davanja saglasnost na Statut AKAZ-a od strane Parlamenta Federacije BiH, ponovno sastaje Upravni odbor i usvaja Statut.

Tačkom XXV. mijenja se član 61. stav 2. važećeg Statuta. Naime, utvrđuje se da sve opće akte donosi Upravni odbor na prijedlog direktora, obzirom da je isto u skladu sa 27. stav 1. alineja 1. Zakona o sistemu poboljšanja kvaliteta, sigurnosti i o akreditaciji u zdravstvu. Saglasno članu 30. citiranog Zakona nije određena nadležnost direktora za donošenje općih akata.

Tačkom XXVI. mijenja se član 65. važećeg Statuta tako da se brišu riječi: „Savjetodavno vijeće”.

Tačkom XXVII. regulira se obaveza usklađivanja postojećih općih akata AKAZ-a sa odredbama ovog Statuta u roku od tri mjeseca od dana stupanja na snagu istog.

Tačka XXVIII. određeno je vrijeme stupanja na snagu Statuta.

IV – FINANSIJSKA SREDSTVA

Provođenje odredbi ove odluke, odnosno statuta osigurat će se u okviru sredstava predviđenih Finansijskim planom AKAZ-a.